



ეთიკის კოდექსი. სტუდენტის და პროფესიული სტუდენტის ქცევის წესები

1. ეთიკის კოდექსი. ქცევის წესები

ბნსუ-ში ქცევის წესები და ეთიკის კოდექსი ეყრდნობა სამართლიანობის, ხალხის პატივისცემისა და პირადი და პროფესიული პასუხისმგებლობის პრინციპებს და გულისხმობს:

- საქართველოს კონსტიტუციით გარანტირებული და საყოველთაოდ აღიარებული ადამიანის უფლებების და თავისუფლებების აღიარებას და დაცვას, საქართველოს კანონმდებლობით დადგენილი ნორმების შესრულებას;
- ნებისმიერი სახით დისკრიმინაციის დაუშვებლობის აღიარებას;
- ყველა სტუდენტისთვის თავისუფალ გარემოში თანასწორ პირობებში განათლების მიღების უფლების აღიარებას;
- პიროვნების კანონიერი ინტერესების, ინტელექტუალურ საკუთრების, გამოგონებების და საავტორო უფლებების დაცვას;

სტუდენტი/პროფესიული სტუდენტი ვალდებულია:

- იყოს კანონმორჩილი, ზოგადსაკაცობრიო ღირებულებებისადმი ერთგული, მოქალაქეობრივი თვითშეგნების მქონე პიროვნება;
- დაიცვას ეთიკისა და ქცევის საყოველთაოდ მიღებული ნორმები;
- ჰქონდეს პიროვნული, მოქალაქეობრივი და სოციალური პასუხისმგებლობა, ვალდებულებების შესრულების და ეთიკური ნორმების დაცვის მოტივაცია;
- ჰქონდეს საკუთარი და სხვისი კანონიერი ინტერესების, უფლებების და თავისუფლებების დაცვის, ღირსებისა და უფლებების აღიარებისა და პატივისცემის მოტივაცია;
- დაემორჩილოს ბნსუ-ს მარეგულირებელ წესებს;
- არ ჩაიდინოს ისეთი ქმედება, რომელიც ბნსუ-ს მიერ მიჩნევა ქცევის წესების დარღვევად და იწვევს დისციპლინურ სახდელს;
- არ ჩაიდინოს სტუდენტების, პროფესიული სტუდენტების, აკადემიური, მოწვეული, ადმინისტრაციული და დამხმარე პერსონალის და სხვა პირებისადმი უხეში და დამამცირებელი ქმედება, ძალადობა, შეურაცხყოფა, ძალის გამოყენების მუქარა;
- კეთილსინდისიერად და პასუხისმგებლობით მოეციდოს სწავლის პროცესს, მისთვის უნდა იყოს მიუღებელი პლაგიატი, სხვისი აზრის თუ ნაშრომის გამოყენება ავტორის დაუსახელებლად, სხვის მიერ მომზადებული დავალების/ნაშრომის ნაწილობრივ ან მთლიანად გადმოწერა, გამოცდებზე წინასწარ მომზადებული ჩანაწერების გამოყენება, საშინაო/საგამოცდო დავალების შესრულებისას ინფორმაციის გაყალბება და შეცვლა, ყალბი წყაროებისა და მონაცემების გამოყენება და მითითება;
- საზღვაო-საინჟინრო ფაკულტეტის სტუდენტი/პროფესიული სტუდენტი ვალდებულია დაიცვას ბნსუ-ში ჩაცმულობის დადგენილი ფორმა.

სტუდენტმა უნდა იცოდეს, რომ დაუშვებელია:

- ნებისმიერი სახის დისკრიმინაცია, რასიზმი, ფაშიზმი, ძალადობის პროპაგანდა, რელიგიური ფანატიზმი, საქართველოს კონსტიტუციით და მოქმედი კანონმდებლობით გარანტირებული უფლებებისა და თავისუფლებების ხელყოფა და შეზღუდვა;
- სიტყვიერი შეურაცხყოფა, ცილისწამება, ღირსების შეურაცხყოფელი ქცევა;
- სხვა სტუდენტებისთვის/პროფესიული სტუდენტებისთვის განათლების მიღების უფლების შეზღუდვა და სასწავლო პროცესის ჩაშლა; სხვა სტუდენტების/პროფესიული სტუდენტის მიერ ბნსუ-ს შენობით, მატერიალურ-ტექნიკური რესურსებით და წიგნადი ფონდით სარგებლობის უფლების შეზღუდვა;
- ბნსუ-ს ეთიკის კოდექსის და ქცევის წესების, შინაგანაწესის, სასწავლო პროცესის და სხვა მარეგულირებელი დებულებების დარღვევა, სასწავლო/გამოცდის პროცესის ჩაშლის მცდელობა, მეცადინეობებზე/გამოცდებზე დაგვიანებით შესვლა, თვითნებურად მიტოვება ან ქცევის წესების/წესრიგის დარღვევად მიჩნეული სხვა ქმედების ჩადენა;
- დაცვის სამსახურისადმი დაუმორჩილებლობა და გაფრთხილების უგულვებლყოფა, წესრიგის დარღვევა, ბნსუ-ს შენობის და ტერიტორიის დაზიანება და წესრიგის დარღვევად მიჩნეული სხვა ქმედების ჩადენა;
- სხვისი, მათ შორის ბნსუ-ს საკუთრების მითვისება, ბნსუ-ს დოკუმენტების/ჩანაწერების ფალსიფიცირება, გადაკეთება, შეცვლა და განადგურება, ბნსუ-ს მატერიალურ-ტექნიკური ბაზის განზრახ დაზიანება/განადგურება, საფრთხეში ჩაგდება და არადანიშნულებისამებრ თვითნებურად გამოყენება;
- განზრახ, გაუფრთხილებლობით ან დაუდევრობით ისეთი ვითარების შექმნა ან ისეთი ქმედების ჩადენა, რომელიც საფრთხეს უქმნის ბნსუ-ს მატერიალურ-ტექნიკურ ბაზას, ადამიანების სიცოცხლეს, ჯანმრთელობას და უსაფრთხოებას;
- საგანგებო სიტუაციის შექმნა ან/და საგანგებო სიტუაციების შესახებ ცრუ ინფორმაციის გავრცელება;



- ბნსუ-ს შემობაში/ტერიტორიაზე აკრძალულ (არანებადართულ) ადგილებში თამბაქოს მოწევა, აზარტული თამაშები, ალკოჰოლური სასმელების შემოტანა, გავრცელება და მოხმარება, ასაფეთქებელი საშუალების, ცივი ან/და ცეცხლსასროლი იარაღის, საფრთხისშემქმნელი მასალების შემოტანა, შენახვა, გავრცელება, გამოყენება, ნარკოტიკული, ძლიერმოქმედი ან/და ტოქსიკური საშუალებების შემოტანა, შენახვა, გავრცელება და მოხმარება, ქურდობა, ყაჩაღობა, ძალადობა, ძალის გამოყენება, თავდასხმა, საქართველოს კანონმდებლობით გათვალისწინებული სხვა სამართალდარღვევების ჩადენა.

2. გამოცდებზე/დაცვებზე სტუდენტის/პროფესიული სტუდენტის ქცევის წესები

- შუალედურ, დასკვნით და დამატებით გამოცდებზე (შემდგომში - გამოცდა) დასაშვებია მხოლოდ ნებადართული პირადი მოხმარების და ჰიგიენის (წყალი, წამლები, ხელსახოცები, კალამი და სხვ.) ნივთებისა და ლექტორის მიერ წინასწარ განსაზღვრული ნებადართული ცნობარების/სხვ. შემოტანა (უნდა განთავსდეს საგამოცდო მაგიდის ზედაპირზე). დაუშვებელია: გამოცდაზე დაგვიანება; ქურთუკით, ქუდით ან თავსაბურავით შემოსვლა; დაწყებული გამოცდის მიტოვება; არანებადართული ნივთების (სასწავლო მასალის/სახელმძღვანელოს, ნებისმიერი სახის ჩანაწერების, მობილური ტელეფონის, ნოუტბუქის, ყურსასმენების და სხვადასხვა ხელსაწყოების) შეტანა, გამოყენების მცდელობა/გამოყენება; გამოცდაზე ქცევის წესების დარღვევა (გადალაპარაკება, აუდიტორიაში სიარული, რაიმე ფორმით დახმარების გაწევა ან/და მიღება, სხვა პირებისთვის ხელის შეშლა, გამოცდის ჩაშლის მცდელობა/ჩაშლა) ან ბნსუ-ს შინაგანაწესით და ბნსუ-ში მოქმედი ეთიკის კოდექსის და ქცევის წესების დარღვევად მიჩნეული ქმედების ჩადენა; საგამოცდო ფურცლის დაზიანება (მათ შორის, რაიმე სახის მინაწერის/ წარწერის ან გრაფიკული გამოსახულების დატანა, რომელიც დაკავშირებული არ არის საგამოცდო დავალების შესრულებასთან);
- დაცვაზე დასაშვებია მხოლოდ ნებადართული პირადი მოხმარებისა და ჰიგიენის (წყალი, წამლები, ხელსახოცები და სხვ.) ნივთების, დაცვაზე წარსადგენ ნაშრომთან/ანგარიშთან დაკავშირებული მასალების (სქემები, ნახატები, ცხრილები ან სხვა საილუსტრაციო მასალა) და მოწყობილობების შემოტანა. დაუშვებელია: დაცვაზე დაგვიანება; ქურთუკით, ქუდით ან თავსაბურავით შემოსვლა; დაწყებული დაცვის მიტოვება; არანებადართული ნივთების (მობილური ტელეფონის, ყურსასმენების და სხვ.) შეტანა, გამოყენების მცდელობა/გამოყენება; გამოცდაზე ქცევის წესების დარღვევა (გადალაპარაკება, აუდიტორიაში სიარული, რაიმე ფორმით დახმარების გაწევა ან/და მიღება, სხვა პირებისთვის ხელის შეშლა, დაცვის ჩაშლის მცდელობა/ჩაშლა); ბნსუ-ს შინაგანაწესის, ეთიკის კოდექსის და ქცევის წესების დარღვევად მიჩნეული ქმედების ჩადენა;
- გამოცდაზე/დაცვაზე წესრიგის დარღვევად მიიჩნევა: 1) არანებადართული ნივთების შემოტანა, გამოყენების მცდელობა/გამოყენება, 2) გამოცდაზე/დაცვაზე ქცევის წესების დარღვევად მიჩნეული ქმედება ან ბნსუ-ს შინაგანაწესით, ეთიკის კოდექსის და ქცევის წესების დარღვევად მიჩნეული ქმედების ჩადენა. გამოცდაზე/დაცვაზე წესრიგის დარღვევის შემთხვევაში სტუდენტს/პროფესიულ სტუდენტს ეძლევა გაფრთხილება, ხოლო მიღებული გაფრთხილების მიუხედავად განმეორებით იგივე ან სხვა დარღვევის ჩადენის შემთხვევაში სტუდენტი/პროფესიული სტუდენტი კარგავს გამოცდის/დაცვის დასრულების უფლებას (ფიქსირდება შეფასება 0 ქულა), დგება ახსნა-განმარტებითი ბარათი წესრიგის დამრღვევის სახელისა და გვარის და მის მიერ ჩადენილი ქმედების მითითებით, წესრიგის დამრღვევის მიმართ დაიწყება დისციპლინური წარმოება და იქნება გამოყენებული ბნსუ-ს შინაგანაწესით გათვალისწინებული სახდელი;
- გამოცხაზე/დაცვაზე ქურთუკით, ქუდით ან თავსაბურავით შემოსვლის ან არანებადართული ნივთების შემოტანის შემთხვევაში სტუდენტი/პროფესიული სტუდენტი ვალდებულია დატოვოს ეს ნივთები მითითებულ განცალკევებულ ადგილას, დაუმორჩილებლობის შემთხვევაში მისი ქცევა მიიჩნევა გამოცდაზე/დაცვაზე წესრიგის დარღვევად;
- სტუდენტს/პროფესიულ სტუდენტს კარგავს გამოცდაზე/დაცვაზე შესვლის (გამოცდაზე/დაცვაზე დაგვიანების შემთხვევაში), გამოცდის/დაცვის დასრულების (გამოცდის/დაცვის მიტოვების ან გამოცდაზე/დაცვაზე წესრიგის დარღვევის შემთხვევაში) უფლებას. გარდა ამისა, გამოცდაზე/დაცვაზე არგამოცხადების/დაგვიანების, გამოცდის/დაცვის მიტოვების ან გამოცდაზე/დაცვაზე წესრიგის დარღვევის შემთხვევაში მას არ აქვს სხვა ვადაში ამ გამოცდის/დაცვის დანიშვნისა და ჩატარების მოთხოვნის უფლება. საპატიო მიზეზის გამო გამოცდაზე/დაცვაზე არგამოცხადების/დაგვიანების ან გამოცდის/დაცვის მიტოვების შემთხვევები განიხილება ინდივიდუალურად და შეიძლება იყოს მიღებული გადაწყვეტილება სტუდენტისთვის/პროფესიული სტუდენტისთვის სხვა თარიღში ამ გამოცდის/დაცვის დანიშვნის შესახებ, რაც ფორმდება შესაბამისი ფაკულტეტის დეკანის განკარგულებით;
- საგამოცდო ფურცლის დაზიანების (მაგ., საგამოცდო ფურცელზე რაიმე სახის მინაწერის/წარწერის ან გრაფიკული გამოსახულების დატანა, რომელიც არ არის დაკავშირებული საგამოცდო დავალებასთან) შემთხვევაში არ ხდება საგამოცდო ნაშრომის განხილვა (ფიქსირდება შეფასება 0 ქულა) და დგება ახსნა-განმარტებითი ბარათი ნაშრომის შეფასებაზე უარის თქმის მიზეზის მითითებით;
- ბნსუ-ში გამოცდის/დაცვის დროის ლიმიტია დადგენილი. სტუდენტს/პროფესიულ სტუდენტს არ აქვს უფლება თვითნებურად გაზარდოს დადგენილი ლიმიტი ან მოითხოვოს მისთვის ამ ლიმიტის გაზრდა.